


TEZAU LITURGIC

24 IANUARIE

**ACATISTUL
SF.CUVIOASE
XENIA
GRIGORIEVNA
DE LA
ST.PETERSBURG
III**



MOSCOVA, 2000



Ака́фист

святѣй блаже́нней

Ксе́нии Петербу́ржстей

Кондак 1

Избранней в послѣдняя лета от народов
Российских, Божией праведнице, страннице
Петрова града, Христа ради телом и духом
обнищавшей, и юроду себе сотворшей составим
похвалу. Ты же, о блаженная мати, яко имущи
ко грешным милосердіе велие, не возгнушайся
молением нашим, да вси взываем:
Радуйся, блаженная мати Ксение, молений
наших скорая послушательнице!

Икос 1

Ангельския Силы возрадовашася на небесех,
зряще тебе, новую угодницу Божию, земною
воинствующею Церковью прославляему и многи
люди от житія твоего Евангельскому
благочестию поучающіяся. Мы же, аще и
недовольно ве́мы о житіи твоѣм, обаче
добродетельми твоими во гресех обличаеми и
просвѣщаеми, радующеся, тя восхваляем:
Радуйся, Ксение блаженная, на небесех ныне
истинно блаженствующая;
Радуйся, Русскія земли благовонный крине;

Радуйся, града Святаго Петра достойное
украшение;
Радуйся, горлице Божия, себе в благоуханную
жертву принесшая;
Радуйся, ластовице Богогласная, многим
сладкую весну покаяния и спасения
возвестившая;
Радуйся, страннице Господня, странничеству
духовному ны научающая;
Радуйся, звездо-путеводительнице наша к
Мысленному Солнцу;
Радуйся, немощным христианом последних
времен утверждение и утешение;
Радуйся, к падшим на дно погибели милостивно
нисходящая;
Радуйся, и мене, помраченного, светом
Христовы веры просветившая;
Радуйся, токмо помыслившим о тебе скорейшую
помощь подающая;
Радуйся, и не ведущим тя чудесне
пособствующая;
Радуйся, блаженная мати Ксение, молений
наших скорая послушательнице!

Кондак 2

Видяще родители твои и сродницы такову младу
отроковицу Богом им даровану, здоровьем и
лепотою украшену, веселящся к пастырю
церковному текоша, иже тя святым Крещением

просвети и в честь преподобных странницы Ксении-Римляныни нарече. Или бысть тамо некий Божий человек, иже будущая твоя исправления провиде, или иным образом Господь рабы Своя вразуми, да тако ты возыменуют, обаче по имени твоему бысть житие твое. Мы же, Богу, о всех и о всем промышляющему, взываем: Аллилуия.

Икос 2

Разум недоумеющ, о Ксение, имамы о делех Божиих, в тебе явленных, и что есть буйство о Христе и Духа Свята дарования. Аще и не вемы, кто есть, иже ты в Божественном законе настави, и каково бысть во младенчестве и возрасте девичеством житие твое, обаче веруем, яко ревностно во благочестии пожила еси, и яко чрез все житие твое воспитоваше тя Всесвятый Господь, тесным путем рабы Своя ведый, во еже возмоги ти скорбь невольную и подвиг вольный понести. Сего ради возглашаем ти сицевая:
 Радуйся, Святей Руси дщере истинная, духом тоя напитанная;
 Радуйся, некоего славного рода отрасли благоуханная;
 Радуйся, храма Божия теплая рачительнице;
 Радуйся, молитвы, милостыни и всякаго доброделания добрая любительнице;
 Радуйся, благочестивыми наставники во

истиннем христианством житии назданная;
Радуйся, в чистоте, послушании и смирении
юность проводившая;
Радуйся, в честном супружестве достойне
жившая;
Радуйся, внезапно овдовевши, превелию ревность
о Господе возымевшая;
Радуйся, во едином часе огнем Божия любви
измененная и на подвиг вышеестественный
изведенная;
Радуйся, сорок и пять лет в подвизе
проведшая;
Радуйся, того ради благодать велию помогати
верным стяжавшая;
Радуйся, на небеси Церковнем, яко новая звезда
пресветло воссиявшая;
Радуйся, блаженная мати Ксение, молений
наших скорая послушательнице!

Кондак 3

Сила Вышняго яве осени тогда Ксению, егда
супруг ея, здоров и крепок сый, внезапно,
спасительнаго Таинства не прием, скончася.
Абие отверзошася тогда очи душевной
двадесятошестолетней вдовице, и вся суета и
тление привременнаго мира сего до конца
обнажишася. Сердце же ея печалию
разгарашеся, еда како вечнаго спасения супруг
не улучит. Темже себе умерети, вместо же того

жити, покаяние приносящи в злостраданиях и молитве непрестанней изволила еси. Воле же Господней вся предала еси, поющи Тому: Аллилуия.

Икос 3

Имущи, о Ксение, истинную в Бозе ко искреннему любовь, не плотскую, но паче духовную, уныние и мрачную печаль попрала еси, и мужним именем нарекшись, весело на подвиг тяжкий исшла еси, токмо на Единого Бога и Пречистую Богородицу надеющихся. Тем же мы, мужеству твоему дивящиеся, воспеваем: Радуйся, с прежнею одеждею всея воли своя и разума совлекшаяся;
Радуйся, с мужнею одеждею в терпение скорбей за того облекшаяся;
Радуйся, яко стяжала еси тую любовь, больше коея никтоже имать;
Радуйся, воистину душу за искренняго положшая;
Радуйся, не себе ктому, но Христу и ближнему жившая;
Радуйся, самый разум, яко начаток, благоприятне Богу принесшая;
Радуйся, яко образовательне мужеским именем себе нарекла еси;
Радуйся, яко женскую немощь отвергши, блаженным мужем соделалася еси;

Радуйся, тленное имение гладным и нищим
расточившая;
Радуйся, сего ради в сокровищах небесных часть
улучившая;
Радуйся, самое жилище твое отдавшая, да
вечную обитель обрящеши;
Радуйся, не токмо избыточного чесо, но и самого
насущнаго не имевшая;
Радуйся, блаженная мати Ксение, молений
наших скорая послушательнице!

Кондак 4

Бурею гнева и недоумения сродницы и знаемии
твои смятошася, уведевше, яко ты вся имения
твоя бедным расточаеши и, в мужнюю одежду
облекшись, нища по стогнам града скитаешися,
Андреем Федоровичем нарицающихся и Ксениею
глашати тя воспрещаючи. Егда же тщахуся
неции препятствовати ти, безумною тя именуя,
Сам Господь Сил защити тя, да вси тобою
ущедреннии возгласят: Аллилуиа.

Икос 4

Слышавше благочестивии людие Петрова града,
яко знатная вдовица Ксения нища и яко
безумна по граду скитается, дивляхуся зело.
Познавше же дивныя ея кротость, незлобие и
смирение, еще же зноя и дождя, ветра и мраза,
и поношении от злых человек вышеестественное

терпение, паче же помощь чудодейственную от
тоя бываемую, разумеша в ней истинную
угодницу Божию и возопиша тако:

Радуйся, в стужу в рубище и необувена
ходившая, не имущи, где главы подклонити;
Радуйся, яко токмо благодать Божия согреение
тебе бысть;

Радуйся, злая поношения и надсмешания от
неразумных благодарне терпевшая;

Радуйся, сладость молитвы за обидящих
благодатне вкушавшая;

Радуйся, на телесная и душевная страдания
произвольне себе обрекшая;

Радуйся, яко познала еси смирения Христова в
души твоей благодатное действие;

Радуйся, терпением лютых к состраданию
многих подвигшая;

Радуйся, благодеяния телеси твоему
отвергавшая;

Радуйся, прията тобою лепты абие прочим
нищим подававшая;

Радуйся, великому блаженному Андрею добре
поревновавшая;

Радуйся, на всяку ночь, в лето и зимний мраз
коленипреклоненне вне града молившаяся;

Радуйся, яко бысть молитва твоя, яко крове
излияние;

Радуйся, блаженная мати Ксение, молений наших скорая послушательнице!

Кондак 5

Боготечною звездою моею дерзаю нареци ты, о блаженная! Ты бо иногда образом честного жития твоего к Церкви истинней твердо мя привлекла еси, о твоей любви, самоотвержении и нищете уведевшаго. Аще же и ныне леностне во благе страстей низлежу, к самому деланию заповедей Господних доселе не приступая, чуждым смиренного Духа Христова и всякия добродетели обретаяся, но молю ты, нашу скоропослушницу: очи душевней всеяснейше отверзи ми и ко истинному покаянию настави, да, спасыйся, с тобою воспою Богови: Аллилуия.

Икос 5

Видим в тебе, о мати Ксение, вернейший образ истинного Христу последования: самую бо душу твою возненавидевши, вся вящшая Евангельская заповедания в совершенней мере исполнила еси, изряднейший образ самоотвержения, простоты, кротости, всепрощения, милосердия и любви показующи. Обычныя же всим человеком скорби нивчтоже ты вменила еси, сугубейший крест юродства о Христе и от мира поругания подъемши, совершенного смирения ради. Темже таковыя

песенные венцы соплетем ти:
Радуйся, истинная ученице Христова, путь
творения заповедей Его яве указующая;
Радуйся, в хладности и погибельном нерадении
тем ны обличающая;
Радуйся, пред всякою тварию себе нивчтоже
вменившая и всем под нозе себе повергшая;
Радуйся, о чужих гресех, якоже о своих,
злострадания, плач и моления Богу принесшая;
Радуйся, не токмо небо, но и любовь к тебе
людей наследившая и чрез сие к благотворениям
тех привлекающая;
Радуйся, правды Божией, а не человечесстей
ревностне взыскавшая;
Радуйся, яко болезнованием о страждущих
сердце твое раздирашеся;
Радуйся, ангельским житием преискренне
Богообщение стяжавшая;
Радуйся, дочери Господня истинная, в домех
верных мир и любовь водворившая;
Радуйся, праведнаго обличения нетерпящими
люте изгонимая;
Радуйся, яко выну хулима, стужаема и
преследуема от бесов и злых человеков была
еси;
Радуйся, по словеси Господню, яко мзда твоя
велия на небесех;

Радуйся, блаженная мати Ксение, молений наших скорая послушательнице!

Кондак 6

Проповедница Евангелия деятельная, о блаженная, явилася еси, чудесы многими свидетельствующи, яко едина есть вера истинная — Святая Православная, и един к Богу путь — добродетельное житие и во гресех покаяние. Тако бо купечестей жене близкую кончину предрекла еси, огонь же в доме жены благочестивыя молитвою твоею угасила еси, рекши: возьми пятак, zde Царь на коне, — потухнет; врача же, кончиною супружницы сокрушенна, утешила еси, подружие верное прозорливо тому пославши. Вся же научила еси непрестанно взывать Богу: Аллилуия.

Икос 6

Воссия в тебе, о мати Ксение, яснейший свет благодати Духа Свята, егда, якоже инии глаголют, пребыла еси негде осмь лет духоносными старцы в подвиге твоём наставляема. Егда же паки во град Петров возвратилася еси, всяческими дарами изобилующи, тогда наипаче явилася еси скорбящим — теплое утешение, болящим — врачевание, обидимым — заступление, нищим — обогащение, грешным — обличение и

обращение, заблуждшим — на путь истинный
возвращение, известия о грядущих или
упреждения некоего требующим — истинная
пророчица и воли Божией возвестительница,
бедствия отвращающая. Все же, помощь тобою
обретши, благочестно навывоша вопити тебе
так:

Радуйся, духовную помощь подающая и в
насущных нуждах не оставляющая;
Радуйся, во всячем деле блазе добрая наша
споспешнице;
Радуйся, тайне ношью тяжкия камения для
строения церковнаго носившая;
Радуйся, купцем и возницем в делах преспеяние
чудесне подававшая;
Радуйся, всюду свет утешения и мира
расточавшая;
Радуйся, яко всякому месту и дому посещение
твое благословение Божие бысть;
Радуйся, страждущим и немощным младенцем,
токмо коснувшись, исцеление подававшая;
Радуйся, яко тобою одинокие — подружий,
сироты — матерей обретаху;
Радуйся, Царей благочестивых, яко
Помазанников Божиих почитавшая;
Радуйся, кровопролитие при Царстем дворе
провидевши, горце восплакавшая;
Радуйся, яко, а може аще ты входила еси, тамо

обретаху вси помощь и заступление;
Радуйся, теплая о нас молитвеннице;
Радуйся, блаженная мати Ксение, молений
наших скорая послушательнице!

Кондак 7

Хотящим безумным отроком блаженную не
токмо злыми словесы поношати, но и камением
побити, внезапно устремися на ня, тростию
яростне угрожаючи. Ве́мы, о Ксение, яко не
плотский гнев на сие подвиже тя, но веление
Божие, еже от нас сокровенно, тебе же ведомо
есть. Мнози убо дела святых мнятся миру
соблазн быти, обаче по Бозе суть соделана.
Мним, яко бысть сие, да потщатся людие
милостивии от всякия обиды ограждати тя, или
во образ ревности твоея противу духов нечистых
и злых помыслов, или — да не помыслят ктому
сии жестокосердии и инаго кого тако обидети.
Мы же, выну гневом греховным и яростию
побеждающися, всеми сими наказани бывше,
воспоим Богови: Аллилуия.

Икос 7

Дивни твои глаголи явишася благочестивей
Параскеве, еже: гряди на Смоленское кладбище,
яко Господь ти сына послал есть. Обаче, верою к
тебе понуждаема, скоро тамо тече и обрете
новорожденно отроча, матери своей

лишившееся, еже возрасте и бысть ей чадо
доброе и послушливое, старости же ея
упокоение. Таковое твое благодеяние
вспоминающе, возглашаху тии:

Радуйся, Божия милосердия к нам посланнице;
Радуйся, яко всеблагий Того промысл тобою
явился;

Радуйся, благаго и спасительнаго жития нашего
на земли устроительнице;

Радуйся, о достойнем нашем к вечности
приготовлении попечительнице;

Радуйся, от деяний погрешительных или пустых
нас удерживающая;

Радуйся, благотворити ближним, непрестанне
молитися и каятися ны подвизающая;

Радуйся, многажды свое покровительство
являющая;

Радуйся, последствия грехопадений наших
изглаждающая;

Радуйся, от бед, напастей и обстояний наше
ограждение;

Радуйся, наглыя смерти отвращение;

Радуйся, избавления муки вечныя наша
ходатаице;

Радуйся, на Страшнем Судищи Господни
твердая наша надеждо;

Радуйся, блаженная мати Ксение, молений
наших скорая послушательнице!

Кондак 8

Странна и пришелица на земли, о Ксение, пожила еси и, достойне течение скончавши, уз плоти твоея разрешилася еси, да выну со Христом будеши. Егда же на месте подвигов твоих, Смоленstem кладбище, погребению предана была еси, многия тысящи православных тамо притекаху, самую насыпь могильную на всякое лето на благословение разбирающе, земля бо тая обильне чудеса и исцеления источаше. Еще же и каменные плиты, усердствующими положенныя, на мелкия части раздробиша помощи от тебе требующия. Обаче на лепты, теми оставляемья, часовня на могиле твоей сооружена бысть, да вси чтущии тя возгласят: Аллилуия.

Икос 8

Весь ум к Богу выну, о Ксение, ты имела еси. Аще же и образ иноческий восприяти недостойною себе помышляла еси, обаче житие поистине равноангельное проводила еси: всецелое от мира отречение, дивную чистоту, превелие самоотвержение, глубину смирения и высоту рассуждения, совершенную воле Божией преданность и любовь показующи, окрест же тебе уже благочестию оскудевающе и самому монашеству немоществовати наченшу. Сего ради вси монаси и целомудрия рачителие,

изрядную любовь и веру к тебе имеюще,
непрестанно воспевают:

Радуйся, со апостолом и со пророком
странницей и пришелицей в земнем изгнании
пребывшая;

Радуйся, яко по имени твоему бысть житие
твое;

Радуйся, выну ко отечеству небесному текшая;

Радуйся, очи душевней непрестанно ко Горнему
Иерусалиму имевшая;

Радуйся, со святым Павлом мир себе и себе миру
пропавшая;

Радуйся, умершею себе именовавшая, мертвость
миру сему и совершенную память смертную
показующи;

Радуйся, сыном мира отребие бывшая;

Радуйся, человеком не угождавшая, да истинная
раба Божия будеши;

Радуйся, вси ступени Божественныя лестницы
совершенства христианскаго претекшая;

Радуйся, деятельными восхожденьми в видение
первее и послежде в чертог небесный вшедшая;

Радуйся, яко праведне блаженною именуешися;

Радуйся, яко законне в подвиге юродства
подвизавшися, блаженство неизреченное на
небесех улучила еси;

Радуйся, блаженная мати Ксение, молений
наших скорая послушательнице!

Кондак 9

Всякую надежду на сыны человеческия оставиша родители и сродницы трилетняя отроковицы, вредом ушесе мучимыя, егда рекоша врачеве, яко аще не умрет, обаче слышати никакоже возможет. Егда же помазана бе отроковица елеем от блаженныя Ксении, пению заупокойному по той сотворену, абие страданий избавлена и совершенно исцелена бысть. Такожде и крестьянская жена, тяжко зубы страждущая, и военачальник, хождения лишенный, в храме твоём, Ксение, во едином часе недугов избавишася и воспеша весело: Аллилуия.

Икос 9

Ветия суемудреннии подвига юродства ради Христа разумети не могут, слово бо крестное погибающим юродство есть: иудействующим — соблазн, язычником же и невером — безумие; самих же явных чудес благодати Господней сии вси безумне отвергаются, очеса и слухи затворяюще. Мы же, буйими о Христе со апостолом быти некогда чающе, части же Евангельских юродивых дев тщащся убежати, святей блаженной Ксении воспеваем:
Радуйся, мнящихся о себе мудрыми быти в безумии изобличающая;
Радуйся, простых и смиренных

рассудительными являющая;
Радуйся, токмо обряды блюдущих, силы же
благочестия отвергшихся вразумляющая;
Радуйся, хладным и маловерным нам очеса
душевная отверзающая;
Радуйся, равнодушных от сна нечувствия
восставающая;
Радуйся, смириться под крепкую руку Господню
и во всем Богу предатися ны побуждающая;
Радуйся, тесный путь Креста Господня
велегласно прославляющая;
Радуйся, безропотне и благодарне вся скорбная
терпети понуждающая;
Радуйся, токмо себе самех во всех
приключающихся виновными разумети
научающая;
Радуйся, от противления судьбам Господним,
малодушия, ропота и уныния опасне
предостерегающая;
Радуйся, плотский разум, на Евангельский закон
воздымающийся, посрамляющая;
Радуйся, в смятении, страхе и отчаянии сущих
умиротворяющая;
Радуйся, блаженная мати Ксение, молений
наших скорая послушательнице!

Кондак 10

Спасти некогда восхотела еси воина юнаго от
лютыя безвременныя кончины и вечныя

погибели, аще и не ведяше о тебе, ниже Божией помощи призываше, — беша бо безбожная времена и гонения на Церковь Божию въздымашася. Сего ради в подклети дома некоего внезапно явилася еси ему, абие изыти оттуду повелеваючи, храма бо та вражеским орудием име разрушиться; себе же тому блаженною Ксениею наименовала еси. Егда же, многим летом минувшим, уведо воин, кто еси и где покоятся мощи твоя, радостно благодаряше Бога, взывая: Аллилуия.

Икос 10

Стену нерушиму обретоша ты мнози жены и матери заблуждших и недугом пьянства отягченных: ты бо иногда чтившия ты дщери купеческия мужа, в пьянстве ожесточившася, страшным видением обличила еси, к твердому покаянию наставляши, самого со чады огненнаго запаления избавльши, вместо же лютыя нужды и отчаяния, мир, благополучие и достаток сим доставивши. Темже и ныне в пагубе пьянства пребывающии и погибельными зелиями одурманеннии, к тебе, яко к последнему прибежищу притекают и тщи николиже от тебе отходят, с ними же и мы возглашаем:
Радуйся, падших и заблуждших к Богу водительнице;
Радуйся, всякаго порока, лукавства и лжи

горькая обличительнице;
Радуйся, из бездны падения чудесне
восставляющая;
Радуйся, со даром покаяния и земная благая
щедре дарующая;
Радуйся, чтущим тя чрез все житие многажды
пособляющая;
Радуйся, простым и знатным, в лишениях
жилище и пропитание скоро доставляющая;
Радуйся, кощунника некоего многими скорбьми,
нищетою и голодом мудре наказавшая;
Радуйся, токмо к покаянию обращающегося того
абие ущедрившая и упокоившая;
Радуйся, жене-полковнице тщетне о научении
чад пекущейся непризываемая явившаяся;
Радуйся, абие по исполнении повеленного тобою
желаемое пославшая;
Радуйся, самага Государя Александра Третьяго
от смертного одра восставившая и о рождении
дщери Ксении супруге того прорекшая;
Радуйся, велию любовь твою и ныне на
сродники земныя изливающая;
Радуйся, блаженная мати Ксение, молений
наших скорая послушательнице!

Кондак 11

Пение неумолчное подобает приносить Господу
за вся нам приключаящаяся, добрая и злая, и
восхвалити милости Его, чрез святых являемыея.

Не токмо бо в Российстей стране, но и в дальней Америке блаженная Ксения о чтущих ю попечение являет. Тако некая жена, в самодвижней колеснице со дщерию и зятем едущи, внезапно узре колесницу на краю страшныя пропасти; разумев же, яко не возможен водящаго остановить, абие ко блаженным Ксении и Пелагии мысленно воззва, и чудесне колесница удержана и невредине повернута бе. Сего ради из глубины души благодарственне возгласиша тии: Аллилуия.

Икос 11

Световодящую лучу зрим тя, о блаженная, во мраце последних времен, во тьме неведения нашего и забвения; яко овцы бо расточени есмы, и несть пророка или вождя, и мали суть истиннии советницы; токмо книги Святых Отец и жития угодников Божиих к научению имамы и в молебники тыя Господу усердне предлагаем, тебе же, единой от тех, с надеждею взываем: Радуйся, в годину лютую гонений беззаконным художеством века сего во храме твоём творитися не допустившая; Радуйся, христианом гонимым и во узах держимым верною помощию бывшая; Радуйся, пришедших помолитися тебе от злобных приставников избавльшая; Радуйся, затворену сущу храму твоему, чрез

стены и землю благодатная исцеления
подававшая;

Радуйся, чтущих тя ко взаимному назиданию и
пользе тогда и ныне купно собирающая;

Радуйся, заблуждшим юным, в неверии
ожесточившимся, руку спасения
простирающая;

Радуйся, неверами прельщенным наследником
безбожных времен ко благочестию мосте;

Радуйся, в поисках Истины мятущимся доброе
обретение;

Радуйся, сомнений, недоумений и обстоятельств
наших разрешение;

Радуйся, тончайшаго гласа совести наша выну
послушати научающая;

Радуйся, и ныне, якоже прежде, чудотворящая;

Радуйся, яко чтущая тя девица Ксения, за
всенощным бдением в память твою молишися,
нечаемей смерти избавлена бысть;

Радуйся, блаженная мати Ксение, молений
наших скорая послушательнице!

Кондак 12

Благодать подаждь ми, Даяй всяцей души
брашно духовное, да не буду токмо плоть и
кровь, и уразумею путь духовный, и возмогу
прославить блаженную Ксению, толикую
благодать Твою стяжавшую, яко страсти и
недузи, и лукавии дуси трепетни и ужасни от

нея отбегаху и ктому не возвращахуся, да
взывают вси православнии людие Господеви:
Аллилуия.

Икос 12

Поющи Бога не оскудевай, душе моя, дондеже
живеши, якоже и блаженная Ксения творяше, и
сего ради ныне на небесех выну воспевает
Господа и молится, во еже нам, немощным,
благая не токмо глаголати, но и творити, и
неуклонне и непреткновенне путем Господних
повелений ходити. Темже сие ея прославляем:
Радуйся, подвигом скитальчества твоего велицей
преподобной Марии подобная;
Радуйся, благодать велию, якоже и тая,
стяжавшая;
Радуйся, яко чтут тя православнии народи
купно с древними велицами чудотворцы;
Радуйся, яко вси, любовью к тебе привлекаеми,
изрядную пользу душам получают;
Радуйся, немощствующим иноком последних
времен в недоумениях ясное вразумление;
Радуйся, утонченных козней лукаваго в
нынешнем веце изобличение;
Радуйся, многострадальной России
ясносветящая звездо;
Радуйся, града Святаго Петра и всих градов и
весей русских теплейшая печальнице;
Радуйся, отпадшим от церковнаго единства

Российским чадом покаяния всемошная
просительнице;
Радуйся, гласа вечности в сердцах наших
неумолчная возвестительнице;
Радуйся, всем умом, помышлением и всею
крепостию Бога возлюбити вся ны
наставляющая;
Радуйся, вся собрати во едино и ко Истине и
блаженству вечному привести всеусильне
тщась;
Радуйся, блаженная мати Ксение, молений
наших скорая послушательнице!

Кондак 13

О, святая блаженная мати Ксение, страннице
Петрова града и наследнице горняго
Иерусалима! Нынешнее наше прими убогое
моление и теплейше Господа умоли: избавити
нас нечувствия и сердечнаго ожесточения,
даровати же нам плач и умиление, исполнити
милосердия и смирения, и тако вся нам
простити и помиловати нас, да с тобою купно во
блаженстве вечном воспеваем выну: Аллилуия,
Аллилуия, Аллилуия!

Этот Кондак читается трижды, затем 1-й Икос
«Ангельския Силы возрадовахуся...» и 1-й Кондак
«Избранней в последняя лета...».

ПОЛНЫЙ
АКАФИСТНИК
КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДНИЦЕ
АРХАНГЕЛАМ
И АНГЕЛАМ

І

ИОНЕСКУ
* ПЕКО